

KERATAN AKHBAR

TARIKH : 9 OGOS 2023
AKHBAR : SINAR HARIAN
MUKA SURAT : 31

Jualan OPR dijangka kekal dalam tempoh setahun

TUKARAN ASING		
MATA WANG	BELIAN	JUALAN
1 DOLAR AS	4.58	4.585
1 EURO	5.0302	5.0375
1 DOLAR SINGAPURA	3.4042	3.4092
1 POUND UK	5.84	5.8482
100 RYIAL SAUDI	122.0747	122.2341
100 RUPIAH INDO	0.0301	0.0301

OPR dijangka kekal dalam tempoh setahun

Bagaimanapun bergantung kepada kadar inflasi yang kini terus dalam aliran menurun

KUALA LUMPUR

Bank Negara Malaysia (BNM) dijangka mengekalkan kadar dasar semalaman (OPR) pada 3.0 peratus bagi tempoh enam hingga 12 bulan akan datang, memandangkan inflasi keseluruhan dan inflasi teras menunjukkan trajektori menurun yang berterusan.

Penyelidikan oleh Kenanga Investmenet Bank Bhd bagaimanapun menjelaskan, dalam melihat ke hadapan, kemungkinan perubahan harga makanan dan komoditi disebabkan ketidakpastian dasar kerajaan, risiko geopolitik dan situasi cuaca boleh memberi kesan ketara ke atas unjuran inflasi.

"Oleh itu, BNM dijangka terus menggunakan pendekatan bergantung kepada data dalam proses membuat keputusan," menurutnya dalam nota penyelidikan pada Selasa.

Cabang penyelidikan bank pelaburan itu turut memaklumkan walaupun kenaikan ringgit kepada ambang RM4.50 bagi setiap dolar Amerika Syarikat (AS) baru-baru ini adalah berjangka singkat (kini berlegar dalam julat RM4.54 hingga RM4.57) namun pihaknya mengekalkan pendirian neutral hingga kukuh terhadap trajektori mata wang tempatan bagi tiga hingga enam bulan akan datang berikutan prospek dolar AS yang lemah.

"Indeks dolar AS diunjurkan mengalami aliran rendah iaitu kira-kira paras 95.0 pada suku keempat 2023 kerana kami menjangkakan Rizab Persekutuan Amerika Syarikat (Fed) berubah pendirian dengan cenderung ke arah kadar faedah rendah ekoran dinamik disinflasi yang berterusan dan potensi kelemahan situasi pasaran buruh di AS," tambahnya.

Ringgit juga disokong oleh jangkakan pasaran yang semakin meningkat mengenai potensi peralihan dasar susulan bacaan penurunan Indeks Harga Pengguna teras AS yang tidak dijangkakan bagi Jun.

Menurut penyelidikan Kenanga, walaupun begitu, mata wang tempatan mengalami tekanan daripada perbezaan hasil negatif yang semakin meluas antara bon kerajaan 10 tahun Malaysia dengan AS. - Bernama



Perubahan harga makanan dan komoditi disebabkan ketidakpastian dasar kerajaan, risiko geopolitik dan situasi cuaca boleh memberi kesan ke atas unjuran inflasi. - Gambar hiasan